

Il pari de Universitât furlane

REDAZION / WIKIPEDIA



Petracco intun dissen
di Gianni Di Lena

«A saressin vonde 10 o 20 furlans come Tarcisio Petracco par dismovi il Friûl e tirâlu sù di une cierte apatie e indifferenece che lu fasin dismenteâ dal so gloriôs passât»

(Alfredo Battisti, arcivescul di Udin, inte orazion funebre)

Cent agns indaûr al nassee a Sant Zorç de Richinvelde, ai 29 di Març 1910, Tarcisio Petracco, considerât il pari de Universitât dal Friûl (muart a Udin, ai 5 di Zenâr 1997). Di famee di puars contadins, tal 1920 al piert la mari e a 16 agns al à di molâ i studis e là a vore, ma al continue di bessòl a studiâ, rivant a la lauree in Letaris a Padue. Dopo dai 8 di Setembar dal 1943, al va a insegnâ grêc e latin a Cividât e al devente ancje partigjan clandestin. Dal 1947 al tache a insegnâ al liceu Stellini di Udin, ma, no rivant a mantignî la famee, e par no cirî ricompensis

pe lote partigiane come che vevin fat altris, tal 1949 al emigre in Canadâ, dulà che al scuen lavorâ come muredôr e lavorant. Al torne in Friûl tal 1955, e al insegne fin al 1975 latin e grêc al Stellini di Udin.

UNE BATAIE PENZE _ Dal 1972 al è a cjâf dal Comitât pe universitât furlane, un obietif che in region i conseirs furlans

no aprovin, par no «danezâ la unitât de region». Si decit duncje di fâ une propueste di leç populâr, par passâ parsore de opinion contrarie de region. Ancje chest al falis e si scomence tal 1976 a tirâ sù firmis par une grande petizion. Ai 6 di Mai di chel an al rive l'orcolat a sdrumâ il Friûl, ma di chê tragedie e torne fûr plui fuarte di prime la domande par une universitât dal Friûl. Finalmentri, ai 8 di Avost dal 1977, inte leç pe ricostruzion, e ven include la universitât, dongje a fuarts contribûts pe universitât di Triest, pûr no tocjate dal taramot. Ancjemò no jere previodude la facultât di Medisine; tal 1979, e partis une universitât fantasime cun risorsis e personâl che no jerin vonde pes esigjencis di cui che al veve di scomençâ di nuie. Dopo altris agns di lote, tal 1982 e rive finalmentri la facultât di Medisine, ancje se pe aplicazion de leç si scugnarâ spietâ fin al 1986 pe oposizion fuarte dal Ordin dai miedis. Ai 7 di Fevrâr di chel an e ven ancje metude jù la prime pierre dal pôl scientific de Universitât, ai Riçs, lassant invezit tal centri de citât lis facultâts umanistichis. E je finalmentri in vore la Universitât dal Friûl.